

Uunga siunnersuut: Tuniniaanissamik nittarsaassisarneq aamma nalunaaqutstersuisarneq pillugu Inatsisartut Inatsisaata allanngortinnissaa pillugu Inatsisartut inatsisaat nr. xx, xx. xxx 2026-meersoq (Tuniniaanissamik nittarsaassisarnermut inatsit)
(Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoq)

Saqqummiussissut

(Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoq)

Siullermeerneqarnera

Matumuuna Naalakkersuisut sinnerlugit uunga siunnersuut: Tuniniaanissamik nittarsaassisarneq aamma nalunaaqutstersuisarneq pillugu Inatsisartut Inatsisaata allanngortinnissaa saqqummiutissavara.

Teknologikkut attaveqaqatigiinnermilu ineriartornerit tuniniaanissamik nittarsaassisarnermullu periarfissanik unammillernartunillu pilersitsijuartitsipput, ingammik digitalikkut inoqutinullu attaveqaatini. Tamanna malittarisassanik nutaarsaanissamik erseqqiissaalluarnissamillu pisariaqalertitsivoq, tassani ilanngullugu ullutsinni ussasaarutit pasinaarsaakkat pinngitsoortinniarlugit. Siunnersuutip atuisartut atupilunneqarsinnaasut, soorlu meeqqat inuusuttullu, kiisalu inuit atuinnermut taarsigassarsisut illersorneqarnissaat annertusassava.

Tuniniaanissamik nittarsaassinerit meeqqanut inuusuttunullu takussaaneri, annerusumik inuit attaveqatigiittarfiini, annertusiartorpoq. Eqimattat taakku sunneruminartuupput, niuerneramilu oqariartuutigineqartut suussusersinissaanut ajornakusoortitsikulasuullutik, aammalu tuniniaanissamik nittarsaassineriit qanoq sunnerneqarnerlutik paasiuminaatsissinnaavaat, tassannga pingaartumik tuniniaanissamik nittarsaassineri meeqqat inuusuttullu ilutigisat ussasaarummut nassiussisutut atorneqartillugit.

Inuit attaveqarfiini inummut tunngasumut, kammaginiarnermut, aningaasarsiuutiginiarnermullu oqariartuutit akulerunneri pissutaalluni qaqugukkut oqariartuut aningasaarsiuutiginiarneqartarnersoq takujuminaassinnaavoq, aammattaaq oqariartuutit akulerunnerisa pissutaallutik oqariartuummut isornartorsioruminaanneruvoq. Siunnersuut taamaasilluni qaqugukkut qanorlu meeqqanut inuusuttunullu tuniniaanissamik nittarsaassisoqassanersoq pillugu malittarisassanik ersarinnerusunik pilersitsissaaq, taassumalu ilagalugu imarisat aalajangersimasut sumilu saqqummiunneqartassaneri inernerneqassalluni.

Qaffasissunik aningaasartuutilinnik atuisunut taarsigassarsititsiniarnissamut kiffaanngissusilimmik tuniniaanissamik nittarsaassisinnaaneq maanna periarfissaavoq. Taarsigassarsititsinerit amerlasuut sukkasuumik ajornanngitsumillu pisarput, oqarasuaatillu

angallattakkat atorlugit qinnutigiuminartuullutik, tamassumalu eqqarsaatigilluaqqaanngisamik naleqqutinngitsumillu taarsigassaqaalernissamut aarlerinaat qaffattarpaa.

Taamaattumik siunnersuutip ukiumut procentitigut annertuumik aningaasartuutitalinnik (ÅOP) atuisunut taarsigassissiisartut tuniniaanissamik nittarsaassinnaanissai inerteqqutaalersippaa. Tamassuma saniatigut taarsigassarsiassanik tuniniaanissamik nittarsaassineq pinnguaatinut eqquiniaasitsinermullu tuniniaanissamik nittarsaassinermut atassuteqartillugu inerteqqutaatinneqarnissaa siunnersuutigineqarpoq, kisiannili taarsigassissiisartut timersornermut kiisalu peqatigiinnut aningaasaateqarfinnullu inuiaqatigiinnut iluaqutaasunut aningaasaliinerat tassunga ilaatinneqarnatik.

Tamatuma saniatigut inatsisissatut siunnersuummi atuisartut sukkasuumik pisariitsumillu naammagittaalliutaannik suliaqartuarnissaq pisortatigut atuisartut naammagittaalliuteqartarfissaat siunissamut qulakkeernissaa siunertarineqarpoq.

Inuiaqatigiinni mikisuni immikkut inatsisinik unioqqutitsisimasunut tunngatillugu innuttaasut nunagisaminni oqartussanut kinaassusertik isertuullugu nalunaaruteqarsinnaaneq periarfissaanngikkaangat, nalunaaruteqarnissaminnut tunuarsimaakulasarput. Taamaattumik kinaassutsimik isertuussilluni, unammilleqatigiinnermut inatsimmi unioqqutitsisimasut pillugit aqutsisoqarfiup whistleblowerportal-ia aqqutigalugu Atuisartoqarnermut Unammilleqatigiinnermullu Aqutsisoqarfimmut nalunaaruteqarnermik periarfissaasumut tuniniaanissamik nittarsaassisarnermut inatsimmi unioqqutitsinerit ilanngunneqarnissaa siunnersuutigineqarpoq.

Naggasiullugulu, tuniniaanissamik nittarsaassisarnermut inatsimmut peqqarniitsumik unioqqutitsinermik tunngasunik suliani inuussutissarsiornermik ingerlataqartup pisuutinneqarnermini akiligassitsisummik pineqaatissinneqarsimatillugu, suliffeqarfik pillugu paasissutissat tamanut ammasumik takuneqarsinnaanngorlugit saqqummiunneqarsinnaanissaa siunnersuutigineqarpoq.

Taamatut oqaaseqarnikkut siunnersuut Inatsisartut akuersaartumik suliarinissaanut ingerlateqqippara.